



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Tribunal Distrital Suai
27 Janeiru 2014

Tribunál Distritál Suai la funsiona durante semana ida resin

Hahu husi loron 20-24 no 27-28 Janeiru 2014, Tribunál Distritál Suai kontinua la hala'ó prosesu julgamentu tanba juis sira la iha fatin. Tuir observaun JSMP no klarifikasaun ne'ebé JSMP halo ho ofisial justisa iha Tribunál Distritál Suai katak iha 20-23 tribunál marka ona oráriu julgamentu maibe la konsege realiza tanba juis sira hot-hotu partisipa reuniaun iha Dili. Aleinde ne'e, iha 24, 27 no 28 Janeiru 2014 semana ida ne'e, tribunál laiha oráriu julgamentu sein razaun ne'ebé klaru. Agora dadaun iha juis efetivu nain 4 hamutuk ho juis estajiadu nain 1 ne'ebé hala'o sersivu iha tribunál refere.

“JSMP preokupa tebes ho situasaun ne'e tanba kuaze besik semana 2 ona hahu husi 16 no 17 kontinua too semana ida ne'e, tribunal refere la funsiona. Situasaun ne'e prejudika teb-tebes ba kazu sira ne'ebé tuir orariu tenke julga no konklui nia prosesu,” dehan Diretór Ezekutivu JSMP, Luis de Oliveira Sampaio.”

JSMP konsiente katak juis sira tenke partisipa iha reuniaun importante sira ne'ebé organiza husi Tribunál Rekursu atu deskuti kona-ba situasaun jerál no dezafiu sira ne'ebé tribunál ka juis sira infrenta liu-liu kestaun seguransa no seguridade juis sira nian durante ezerse sira nia funsaun. Maibe JSMP nafatin enkoraza juis sira atu maneja didiak rekursu ne'ebé iha atu la husik tribunál mamuk durante besik semana rua nia laran. Situasaun ne'ebé la akontese iha tribunal sira seluk hanesan Tribunál Dili no Baucau ne'ebé funsiona hanesan normal.

Iha parte seluk, JSMP simu informasaun katak Tribunál Distrital Oe-cusse mós la funsiona too ohin loron, tanba kazu sira ne'ebé atu julga rekere tribunál koletivu no juis iha tribunál refere nain ida deit. Tribunál ne'e so bele hahu fali prosesu julgamentu iha 3 Feveiru 2014.

JSMP haino katak efektividade, konsistensia ho agenda julgamentu no produtivadade institutisaun judisiáriu sira nian importante teb-tebes ba hari'i no hametin konfiansa públiku iha setór judisiáriu. JSMP rejista katak dalabarak krime oi-oin inklui krime omisídiu sira akontese kuaze iha fatin hotu. JSMP prejume katak situasaun ne'e manifesta impresaun ida katak públiku dúvida atu prosesa sira nia kazu atraves hus institutisaun formal sira no sira maneja rasik justisa tuir sira nia dalan, tanba prosesu prosesu formal rekere tempu barak, birokrátiku no tribunál sira adia prosesu sein razaun ne'ebé klaru no impedimentu tekníku sira seluk ne'ebé sira tenke atravesa.

Antes ne'e, JSMP kestiona mós kona-ba laiha oráriu julgamentu ne'ebé akontese iha Tribunál Distritál Baucau, Suai no Oe-cusse katak iha 16 – 17 Janeiru 2014, depois de tribunál sira reasumi fila fali sira nia funsaun, tribunál hirak ne'e la hala'o prosesu julgamentu tanba seidak defini oráriu julgamentu.

JSMP hein katak iha semana ida ne'e ba oin tribunál sira tenke hahu fali agenda julgamentu hanesan normal atu nune' é prinsípiu julgamentu justu (simples, lalais no baratu) nafatin aplika iha tribunál hotu-hotu.

Atu hetan informasaun kompleitu, favor kontaktu:

Luis de Oliveira Sampaio
Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone:3323883 | 77295795

Website: www.jsmp.tl

Face book: www.facebook.com/timorleste.jsmp

Twitter: @JSMPtl